

**Projek Rumah Mesra Rakyat Fokus Utama SPNB Tahun Ini  
Bernama  
26 Februari , 2012**

IPOH, 26 Feb (Bernama) -- Syarikat Perumahan Negara Berhad (SPNB) berjaya menyempurnakan pembinaan 1,007 unit rumah pada akhir bulan lalu daripada 10,000 unit rumah yang disasarkan tahun ini menerusi Projek Rumah Mesra Rakyat di bawah kaedah Sistem Binaan Industri (IBS).

Pengarah Urusannya Datuk Dr Kamarul Rashdan Salleh berkata daripada 1,007 unit rumah mesra rakyat yang telah disempurnakan itu, kebanyakannya dibina di negeri Kelantan, Terengganu dan Kedah.

"Projek Rumah Mesra Rakyat dengan 10,000 unit rumah dengan menggunakan kaedah IBS merupakan fokus utama SPNB tahun ini dengan kos sebanyak RM650 juta," katanya kepada pemberita ketika ditemui semasa program komuniti SPNB bersama mangsa banjir di Kampung Manjoi di sini hari ini.

Rumah-rumah di bawah projek ini adalah bernilai RM65,000 dengan subsidi oleh kerajaan sebanyak RM20,000 manakala RM45,000 melalui pembiayaan Islam, katanya.

Pada program komuniti kali ketiga ini, SPNB turut menyerahkan borang Projek Rumah Mesra Rakyat kepada Ahmad Harun, 65, bagi membina semula rumahnya yang berisiko runtuh selepas dua kali dilanda banjir.

Pada program hari ini, 54 kakitangan SPNB dengan kerjasama Anggota Dewan Undangan Negeri Perak, Datuk Mohd Nadzri Ismail dan Pergerakan Pemuda Barisan Nasional Perak melawat 10 keluarga yang terjejas teruk akibat banjir kilat yang berlaku Selasa lepas. Mereka turut membantu keluarga berkenaan mencuci kediaman mereka.

Selain itu mereka juga melawat 30 anak yatim di Pertubuhan Kebajikan Kasih Nurul Iman negeri Perak yang menjalankan aktiviti memberi perlindungan, pengasuhan dan pendidikan kepada anak-anak yatim dan miskin secara percuma.

Dalam kejadian banjir itu, lebih 150 penduduk daripada 50 buah keluarga di Gugusan Manjoi dan Buntong di sini terpaksa dipindahkan ke dua pusat pemindahan sementara akibat kejadian banjir kilat berikutan hujan lebat.

Kesemua mereka dari Kampung Dato Ahmad Said, Kampung Tengku Hussein dan Kampung Manjoi dipindahkan berikutan paras air di beberapa batang sungai antaranya Sungai Pari dan Sungai Tapah melimpah.

---BERNAMA

Hakcipta © 2012 BERNAMA

Source: <http://www.bernama.com/bernama/v6/bm/newsindex.php?id=648073>